

08/07/2024

Aizawl

1830 Hrs

## REGIONAL NEWS

### HEADLINES:-

1. ZPM Legal Department chuan Mizorama hnu chhui tura CBI hnena remtihna pek a hnungtawlh dawn lo a, Kuhva tawlhruk chu CBI chhuitir ngei ngei chu ZPM duhdan a ni an ti.
2. TNT Chairman Dr. Sangthankima, Padma Shree chuan mite ngaiha misualte; mi à te, ruihhlo ngaite leh chanhaite tana rawngbawl loh a hlauh thu a sawi.
3. Prime Minister Narendra Modia chuan vawiin khan Russia leh Austria tlawh turin a zinchhuak.
4. Jharkhand Chief Minister Hemant Soren-a kaihruai Jharkhand Mukti Morcha (JMM) chuan vawiin khan Assembly ah sawrkar bukna a paltlang.

<><><>

### ZPM PRESS CONF

ZPM Legal Department chuan Mizorama hnu chhui tura CBI hnena remtihna pek kawngah ZPM sorkar chu a hnungtawlh dawn lo an ti a, Kuhva tawlhruk chu CBI chhuitir ngei ngei chu ZPM duhdan a ni an ti.

Vawiin khan ZPM Partypisaah chanchinbu mite hmaah sawiin ZPM Legal Department Gen Secy Pu Vanlalsiama Pachuau chuan sawiin, ZPM Party kaihruai Sorkar chuan Campaign-laia a intiam ang ngeiin, nikum December ni 28 khan CBI nenah General Consent a lo pe tawh a. Nikum December ni 22 khan Parliament-a pass tawh criminal law pathum dan thar hman a lo nih dawn takah chuan thla hmasa ni 20 khan Director, CBI chuan Mizoram Sawrkar Chief Secretary hnena lehkha thawnin Criminal Law thar hman tan a nih dawn vanga Mizoram Sawrkar-in CBI hnena Consent a lo pek tawh chu tun thla ni 1 hma ngeia a thara Gazette Notification tichhuak turin ngenna a thlen a. Mizoram sawrkar chuan a thar hlaka Notification chhuahin CBI henah hian General Consent a pek a ni a ti.

An thuchhuaha an tarlan danin, Eirukna kaihhnawia CBI chhui remtihpuina pek a ngaih chuan Mizoram sorkar a tlanchhe ngai dawn lo an ti a, Ministry kal ta hun laia Corruption Case langsar tak tak Lokayukta-a la inchiah mêk School thuamthatna chungchange NABARD sum chingpen thu leh Ropeway leh Skywalk chungchang ACB-in an chhui mêk te, Lengpui Airport sak chungchange Mizoram First FIR thehluh, MNF Ministry hun laia ACB lama an tihtawp tâk te chu CBI hian chhui ngéi se an duh takzet tih an sawi a. Mipui chanai leh ram hmasawnna sum tihchingpenna kawng hrang hrangah thilsual titu te hrem an nih theihna turin Mizoram sawrkar chuan hma a la zel dawn a, Eirükna do kawngah khawng takin ke a pên zel dawn a ni an ti.

<><><>

## CM

Vawiin khan New Delhi Pragati Maidan-ah Taiwan External Trade Development Council, India bultumin Taiwan Expo, 2024 India neih a ni a. Chief Minister Pu Lalduhoma chuan khuallian niin a hmanpui.

Thusawiin Chief Minister chuan, Taiwan ram chuan technology Innovation lamah entawn tlak takin hma a sawn a, culture ropui leh hmasawn zelna tur remchang tam tak a nei. Mizoram chu Taiwan nena thuk zawka inpawh turin a inpeih a, India hmarchhak ram, South East Asia ram dang te nena awlsam taka inkalpawh theihna, sawrkar laipuiin Act East Policy a kalpui mekna hmun pawimawh tak a ni a ti a. Taiwan leh Mizoram hi Tropic of Cancer paltlang ram ve ve, sik leh sa, ei leh in leh kawng tam taka nunphung inang tak nei an ni a. Taiwan Company te Mizorama rawn luta, theihna leh remchang awm te rawn dai dar turin a sawm tih a sawi a ni

He Expo ah hian Taiwan Company 120 chuang an tel a ni.

<><><>

## AYUSH DEPT

Ayush Dept Dy Director Dr S. Mara Thansiami chuan Ayush Damdawi pawh rahmul damdawi a nih vek bik loh avangin mipuite fimkhur tlanna atan Doctor chawh chauh damdawi ei a him ber a ni a ti a.

He thu hi vawiina Akashvani Corr in a kawmnaah sawiin Dr S Mara Thansiami chuan Doctor te chawh loh damdawi lakah fimkhur a tha a ti a. Damdawi tha tak pawh a eidan ni lova a eilo turin an ei chuan nghawng tha lo a nei thei a ti a. Damdawi ingriedients ah ei teuh teuh loh chi a awm thin a, Ayush Damdawi pawh herbal damdawi an ni kher lo a , Ramhmul damdawi an classify ang a nih loh thu leh dan dik taka siam a nih avangin a ingredients pawh herbal vek a ni lo a ti.

Dr S Mara Thansiami chuan kum upa ho inenkawla turin Ayush Health & Wellness Centre 41 in tun thla chhung hian Geriatric Helathcare neih tum a ni a ti a. Drug Testing Laboratory for ASU & H Drugs damdawi chi hrang hrangte chu GMP Certified emaw Quality Certified chu Zemabawkah Drug Testing Laboratory ah test theih reng a nih thu leh Damdawi chi hrang hrang Ayush Damdawi chauh pawh nilo damdawi thawk phut phut ang chi te pawh hlauhawm a awm theih thu a sawi a.

Tun dinhmunah Ayush Department hnuaih SMPB a awm thu a sawi a. Ramhmul damdawi chingtute tana din anih thu leh kuthnathawktute pawh a in register theih a ti a. SMPB chu rawn reng theih an ni a, Kum 2007 atangin Ayush Doctor rawn theihin an awm tawh thu leh damlote pawh Ayush System hmang pawh a enkawl an tam tawh thu sawiin Pancha Karma Therapy pawh Thenzawlah a lak reng theih a. Civil Hospitalah pawh Drug Control Cell hnuaih Peripheral Pharmacovigilance Centre pawh Doctor 1 enkawlna hnuaih Civil Hospital ah an neih thu leh damdawi side effect nei in report nana hawn a ni a ti.

Ministry of Ayush hi kum 2014 khan din a ni aa, hemi kum vek hian National Ayush Mission kalpui tan nghal a ni a. Kum 2016 atang khan Mizoramah Integrated Ayush Hopital hi Thenzawlah din a ni a, tun dinhmunah khum 50 a

awm mek a. District Hospital tinah Ayush Doctor hi rawn theihin an awm vek a, Civil Hospital ah OPD neiin an awm bawk a ni.

<><><>

#### MJA GBM

Vawiin khan MJA General Headquarters chuan Aizawl Press Club ah General Body meeting an nei a, an pawl thil pawimawh hrang hrang an sawi ho. He hunah hian MJA President, Pu C. Lalrambuatsaiha chuan, thuthar thehdarh kawngah Journalist ten tan an lak thar zel a tul thu a sawi a. Social Media platform hrang hrang hmangtu an pung zel a, hei hian thuthar thehdarhtute a run nasa a, a bikin chanchinbu lam-a thawktute chu Social Media-in a eiral mai loh nan an insang mar a, tun aia chak lehzual-a ke an pen a tul thu a sawi. Pu C. Lalrambuatsaiha chuan, pawl reng reng chak tak-a kal tur chuan thawh hona tha an nei a, member-te an inlungrual a tul tih sawiin, MJA member te chu pawl hmalakna ngaipawimawh thar a, thil tihna zawng zawngah an tel vek hman lo a nih pawhin a tam thei ang ber MJA hmalakna tawiawm thin turin a sawm a ni. Inkhawm hi MJA Vice President, Pu C. Lalhmachuana'n a kaihruai a, MJA member ten an pawl hmachhawp leh hmalakna tura an thil duh hrang hrang an sawi ho a. Kumin June ni 6-a MJA Executive Committee thukhawmin MJA member atana a lak tharte chu MJA President, Pu C. Lalrambuatsaiha'n a lawmlut nghal a ni..

<><><>

#### SALEM VENG EVACUATION

Aizawl Salem veng leimin avanga chhungkaw pariat te in sawnchhuahna hmun chu vawiin khan Aizawl South II bialtu MLA Pu Lalchhuanthangan a tlawh a.

Pu Lalchhuanthanga chuan leimin avanga harsatna tawkte dinhmun zirchiang anih tur thu leh chhawmdawl bakah a siamthat dan kawng ngaihtuah sak anih tur thu a sawi a. Side drain siam dantur leh hmanrua a tul anga ngaihtuah a, hma lak nghal anih tur thu a sawi.

Salem Veng lei tawlh leh khi avang hian mihring chen zuizelna atan a hlauhawm avangin chhungkua pariat te chuan an chenna hi chhuahsan in bungrua te an in senghawi fel tawh a, Local Council House, YMA Hall leh an thenawm remchanga invawm lut te an ni a. Khawtlang hruaitu te leh YMA ten an chenna tur pawh a ngaihtuahpui mek bawk ani.

He hunah hian Bialtu MLA hi Salem veng ZPM Venglai Unit hruaitu ten an tawiawm a ni.

<><><>

#### TNT

TNT Chairman Dr. Sangthankima, Padma Shree chuan mite ngaiha misualte; mi à te, ruihhlo ngaite leh chanhaite tana rawngbawl loh a hlauh thu a sawi. Vawiin khan TNT, Kolasib Branch chuan TNT founder leh Chairman nilai Dr. Sangthankima'n India civil mite chawimawina sang ber Padma Shree Award a dawn lawmpuina an buatsaih a, he hun hi Kolasib bialtu MLA, Pu Lalfamkima, Assembly Dy Speaker in a hmanpui a.

Hetah hian thu sawiin, Pu Sangthankima chuan TNT chu khawvela Home lian ber niin, TNT Hqrs., Muanna Veng, Aizawl-ah kawng hrang hranga harsatna tawk mi

1810 enkawl mek anih thu sawi in, TNT chu harsatna tam tak paltlang in, Pathian chauh rinchhan a kal annih thu a sawi.

Padma Shree Award chu a dil anih loh thu te, hetiang chawimawina hi a beisei loh leh a phuloh thu a sawi a ni.

Assembly Dy Speaker Pu Lalfamkima chuan, rilru, taksa leh thlarau lama kawng hrang hranga harsatna tawktute tana ding Thutak Nunpuit Team (TNT) dintu leh thawktu zawng zawngte thawhrimna fakawm a tih thu a sawi a, rawngbawlna ruhrel lian, hmalakna ropui tak leh mi thahnem tak enkawl thei turin Pathian atanga chhuak hmangaihna tello chuan mihring taka tlin chi ani lo, a ti a. Pathian ringtu leh Pathiana in nghatte tan lo chuan TNT rawngbawlna chu kalpui theih anih a rin loh thu a sawi.

Dy Speaker chuan, Mizoram ah Home tam tak din anih tawh thu sawiin, heng zinga thenkhat chu tanpuina leh a behbawm a buai thin ni a a hriat thu leh chutiang Home chu a din rei ngai loh thu a sawi a, sorkar leh mite tanpuina ringawta in nhat velo- TNT a awm chu Mizo mipuite tan a vanneihthlak in, mi tam tak tana harsatna sut kian saktu anih thu a sawi bawk.

<><><>

#### SERCHHIP PRISONER ARREST

Serchhip Dist jail aṭanga tlan chhuak Myanmar mi 2 a pakhat zawa Lalnunne kum 31 Thántlang myanmar chu, tukin khan Serchhip hmar chhak lama awm, Vanchengte kham hnuiah hliam na tak tuarin hmuh a ni a. Serchhip police ten Vancheng khaw mi tlawnngaite puihnaa an lak chhuah a nih hnu ah, enkawl zui vawiin khan Aizawl civil hospital panpui a ni.

Puan tawh angin Lalnunne kum 31 Thántlang myanmar chu, tukin khan Serchhip hmar chhak lama awm, Vanchengte kham hnuiah hliam na tak tuarin hmuh a ni a, chaw an eitir laia a tlan chhia chu lengkira khamah tlan liamin, a ke vei lam ruh a khup velah a sawh tliak a, a ha hmai a sawh nghing bakah, a lu ah hliam a awm bawk a. An hmuh tirhah chuan a lo chau hle a, nachhawkna leh damdawi dang te nen uluk taka enkawl a nih hnuah a lo harh ṭha leh tawh a. A ṭhianpa, a tlanchhuahpui Lalchhanhima kum 41 Leisen Myanmar erawh, hmuh a la ni lova, ngawrh taka la zawn mek zel a ni.

<><><>

#### PM

Prime Minister Narendra Modia chuan vawiinah Russia leh Austria tlawh turin a zinchhuak a. A zinchhuah hmaa social Media-a a thudahah PM Modia chuan tun tum a zin tur chuan Russia leh Austria nena inlaichinna tha an neih mek ti nghet leh turin hun tha a siam a beisei a ti a. Heng ram pahnihte nen hian hun rei tak an intian tawh a ni a ti bawk. Heng a ram tlawh tura India mi chengte nena inkawmhona hun tha tak an hman a tum thu a sawi a ni.

Moscow ah India leh Russia Annual Summit vawi 22 na a hmang ang a. He hunah hian Russia President Vladimir Putin nen ram pahnih inlaichinna hrang hrang ralhuam, sumdawnna, investment, energy, zirna, culture leh mipuite inzawmna te an sawidun ang.

Prime Minister Narendra Modia chuan Austria a tlawh dawn bawk a, kum 40 hnua India PM zinga Austria tlawh leh hmasa ber a ni ang.

Austria Chancellor Karl Nehammer chuan Prime Minister Narendra Modia'n Vienna a lo thleng tur chu an nghakhlel hle tih social media ah a sawi a. An tan hun chhinchhiahtlak tak anih thu sawiin kum 40 hnua India PM in an tlawh leh

vawi khatna tur a ni a ti a. Hei bakah hian India leh Austria te thawhdunna kum 75 tlin champha a ni dawn tih a sawi bawk a. Hun lo kal turah ram pahnih inkarah inlaichinna tha a awm belh zel a beisei tih sawiin thawhdunna tha tak tak nei tura an inbiak ngei a beisei a ti bawk.

Prime Minister Modia pawhin Austria Chancellor hi lawmthu hrilhin Austria a tlawh thei tur chu lawmawm a tih thu a sawi a. Ram pahnih inkar ti ng het zual turin inbiakna hun tha tak an hman a beisei a ti a. Mipui rorelna democracy, zalenna leh dan hnuia rorelna chu an innghahna anih avangin an inlaichinna pawh a hma aia tha zawkin an siam a beisei thu a sawi a ni.

<><><>

#### JHARKHAND CM WINS TRUST VOTE

Jharkhand Chief Minister Hemant Soren-a kaihruai Jharkhand Mukti Morcha (JMM) chuan vawiin khan Assembly ah sawrkar bukna a paltlang. JMM kaihruai sawrkar-a MLA 45 chuan sawrkar an thlawp a. Chief Minister hian sawrkar rintawkna motion hi vawiin khan pulutin sawiho a ni a. Sawrkar buk tura vote thlak laiin eptu lamin lungawilohna lantirin Pu Soren-a sawrkar an duhlozhia an aupui a. Hemi hnu hian vote chhiar fel niin rorel inkhawm chu tiamchin awmlova tihtawp a ni.

Kum 48-a upa Hemant Soren hi tun thla ni 4 khan Chief Minister atan lakluh a ni leh a. Hun engemawchen sum chhehrelh thubuaiah man niin hnuah bail-a chhuah a ni a. Vawiin chawhnu khan sawrkar thar minister te lakluh an ni.

<><><>

#### RAHUL GANDHI

Congress hreraitu leh Lok Sabha Opposition Leader Rahul Gandhi chuan vawiinah Manipur a tlawh. Pu Ganchi-a hian Jiribam-a tualchhung buaina avanga harsatna tawk chhungkua chhawmdawlina camp hrang hranga enkawlte a tlawh a. Manipur Governor Anusuya Uikey a tlawh bawk ang. Pu Gandhia'n Manipur a tlawh dawn avang hian venhimna pawh khauh taka kalpui a ni.

<><><>